

HAK DAN KEBEBASAN PEREMPUAN

RIWAYAT SITI HAJAR YANG MENJADI SEJARAH YANG CEMERLANG

Di dalam makalah saya yang lalu telah meriwayatkan tentang putih hati dan ketulusan Siti Sarah mengkahwinkan suaminya nabi Ibrahim kepada seorang perempuan bangsa Qibti iaitu Siti Hajar yang riwayatnya akan disuntingkan pula di sini bagi perhatian pembaca-pembaca sekalian.

Siti Sarah sangat memuji dan menumpahkan kepercayaan yang penuh kepada Siti Hajar ialah oleh kerana baik budi dan tingkah lakunya dan jika tidak yang demikian itu tentulah tidak sekali-kali Siti Sarah akan mengkahwinkannya dengan suaminya padahal menurut lazimnya bahawa seseorang isteri itu tidak akan mau mengkahwinkan suaminya kepada perempuan lain.

(oleh Ummu Mohsin)

Sebagaimana yang tersebut didalam riwayat setelah Nabi Ibrahim beristerikan Siti Hajar maka tidak lama antaranya ia mendapat seorang anak lelaki lalu dinamakan Ismail. Setelah ia beroleh anak itu tidak lama kemudiannya maka Siti Sarah yang telah putus harap daripada beranak pun dikurniakan Allah seorang anak lelaki lalu dinamakan Ishak. Jadi bertiga orang tadi telah menjadi lima orang yang tinggal serumah – Siti Hajar memelihara anaknya Ismail dan Siti Sarah memelihara anaknya Ishak dengan Nabi Ibrahim memerhati dan mengawal mereka itu. Kedua-dua anak mereka itu masih kecil yang sudah tentulah ada tabiat kanak-kanak kepada mereka sekalipun kedua-dua mereka itu menjadi utusan Allah dan demikian juga kedua-dua ibu mereka itu tentulah mengasihai anak-anak masing-masing lebih daripada yang lain. Ini memang menjadi kebiasaan. Tetapi nabi Ibrahim kasih sayangnya kepada kedua-dua anaknya sama sahaja, tidak melebihkan seseorang di antara seseorang.

Pemberian yang sama kepada kedua-dua anaknya itu oleh nabi Ibrahim sekali-kali tidak menyenangkan hati Siti Sarah. Yang demikian ini lebih-lebih lagi apabila kedua-dua mereka itu berkelahi di dalam mana Ismail selalu memukul Ishak

dan kerana ia besar sudah tentu Ishak kalah. Dengan keadaan ini maka timbulah perasaan tak senang hati daripada Siti Sarah lalu menuntut supaya ia berumah sendiri dan Siti Hajar disuruh berumah sendiri. Kalau kita perhatikan tentang apa-apa yang terjadi bahawa kehendak Siti Sarah itu bukan disebabkan kerana bermadu; sekiranya disebabkan kerana bermadu sudah tentu ia tidak sekali-kali akan mengkahwinkan suaminya itu kepada Siti Hajar pada hal kedua-dua mereka itu telahpun serumah sebelum lagi mereka bermadu dengan masing-masing mengetahui tabiat dan perangai mereka.

Di sini tidak tujuan saya hendak mengulas perihal bermadu itu tetapi marilah kita melihat bagaimana perdirian mereka itu yang terbitnya, menurut pandangan saya, tidak lain disebabkan tingkah laku anak-anak mereka jua. Setelah menimbang dengan semasak-masaknya dan setelah memikirkan bahawa tinggal bersama-sama itu tidak akan mendatangkan kebahagiaan dan kebaikan rumahtangga maka nabi Ibrahim pun mengambil keputusan lalu ia pergi membawa Siti Hajar dan Nabi Ismail pindah dari Palestin ke suatu lembah yang sekarang ini menjadi bandar Mekah yang diberkati Tuhan. Lembah ini asalnya ialah tempat singgah kabilah-kabilah bangsa Arab tatkala mereka balik dari Syam hendak ke Yaman dan dari Yaman

hendak ke Syam. Ketika Siti Hajar tiba di sana pada masa itu kebetulan tidak satu kabilah membuat khemah di situ dan dengan demikian Nabi Ibrahim pun meninggalkan kedua-dua beranak itu di situ dengan menyerahkan sahaja kepada Allah yang Maha Pemelihara kepada hamba-hamba-Nya serta meninggalkan perbekalan dan minuman dengan secukupnya. Setelah itu maka nabi Ibrahim pun balik pula ke Palestin tinggal bersama-sama dengan Siti Sarah dan Ishak.

Tidak lama antaranya sepeninggalan nabi Ibrahim itu maka bekalan mereka telah habis dan demikian juga air minum yang dibawanya habis pula sedang anaknya telah dahaga hendak minum. Di sini dapatlah kita menganggap dan memerhati bagaimana payah dan susahnya ibu itu yang telah ditinggalkan di suatu lembah yang tidak ada rumah,tidak ada tumbuhan-tumbuhan tidak ada pula orang lalu lintas di suatu negeri yang tandus dan dengan yang demikian di manakah mereka dapat air? Semuanya itu ialah takdir Tuhan – ia terima dengan tenang dan sabar sekalipun di mana ia diletakkan oleh suaminya ia mengikut kerana ia mengetahui bahawa suaminya itu ialah utusnya Allah masakan Allah mensia-siakan utusan-Nya. Ia yakin bahawa Nabi Ibrahim melakukan yang demikian itu adalah semuanya dengan perintah Allah dan dengan sebab itu ia tidak berkeluh kesah, ia tidak mengutuk suaminya dan menyesali untungnya serta tidak gentar dan takut ditinggalkan oleh suaminya di padang tandus yang tidak ada manusia itu.

Kecekalan dan ketabahan hatinya jarang didapati ada didalam hati perempuan kerana telah menjadi kebiasaan kalau sedikit sahaja berkisar daripada rumahnya ia tidak mau berpisah dengan suaminya kalau boleh setiap saat dan masa mereka menghendaki suaminya mesti ada di sisinya.

Walaupun Siti Hajar telah mengetahui akan keadaan padang tandus tidak berair, sebagai sifat manusia mestilah ia mencari dan berikhtiar untuk mendapat air kerana barang siapa mencari sesuatu dengan bersungguh-sungguh serta berikhtiar dengan sedaya upaya maka tentulah Allah akan menyampaikan maksud-Nya.

Mendengar anaknya terus menangis meminta air minum sedang

air setitik pun tidak ada kepadanya maka ia pun meninggalkan anaknya di situ pergi bergopoh gapah mencari air dan sejurus kemudian didengarnya suara orang dari Safa yang menyatakan di situ ada air lalu dikejarnya tetapi setibanya di situ didapatinya tidak ada apa-apa pun, ia berdiam sejurus dan kemudian didengarnya lagi suara dari Marwah dan ia pun berkejar ke sana tetapi tidak ada satu apa pun didapatinya. Demikianlah tujuh kali ia berulang alik dari Safa ke Marwah tetapi air yang dicarinya itu tidak didapatinya. Keadaan yang demikian ini sudah tentu menjadikan ia jemu dan putus harap dan iapun balik ke tempat anaknya dan alangkah sukacita dan gembiranya apabila dilihatnya di tempat duduk anaknya itu terpancur mata air iaitu yang dinamakan Zamzam yang hingga masa ini masih ada di tanah Mekah itu. Yang demikian ini adalah sangat-sangat mengembirakan dan menjadilah kesyukuran kepada ibu yang sabar itu dan di sini adalah menjadi pertunjuk kepada manusia itu tidak boleh berputus harap di dalam kehidupan. Tidak boleh berputus harap di dalam berusaha dan tidak boleh berputus harap di dalam berikhtiar. Dan berkeyakinan bahawa Allah akan menolong mereka.

Tidak lama antaranya maka terhebahlah kepada kabilah-kabilah yang berulang alik di situ bahawa di sana ada mata air dan di dalam perjalanan itu kabilah-kabilah itu pun bertukarlah air dengan makanan-makanan kepada Siti Hajar. Dengan jalan ini maka kedua-dua beranak itu pun hidup dengan aman dan damai. Dengan adanya mata air di situ adalah menarik perhatian bangsa Arab akan tinggal di tempat itu dan pertama-tama sekali kabilah Arab yang tinggal di sana ialah kabilah Jurhum (Jurhum) setelah Nabi Ismail dewasa maka ia pun kahwin dengan seorang puteri dari kabilah itu.

Diceritakan bahawa pada suatu hari Nabi Ibrahim meminta izin kepada isterinya Siti Sarah untuk ziarah kepada isteri dan anaknya yang ditinggalkan di Mekah itu, Siti Sarah tidak berkeberatan dan meizinkan ia pergi. Nabi Ibrahim pun berangkat ke Mekah dan setibanya di sana ia pun tercengang kehairanan melihat tempat itu telah berubah daripada biasa – rumah-rumah telah

Tingkuon

Dapur Minyak Tanah
Perbuatan Amerika:
Cap Kekupu



Muka atasnya terlengkap dengan timah sari yang kukuh:
Bersih
Ada membawa satu bauan
Kurang memakan minyak tanah.

Lampu Pam:
Cap Bintang
Cap Kekupu
Cap Mata



Terang dan
kurang memakan
minyak tanah.



"Butterfly"
mantle

TRADE MARK
NO. 999

Pembahagi Khas:

LEA HIN Co.,
231, South Bridge Road, Singapore.
Tel: 3166 - T.A. "CHINALAMP"

banyak yang menunjukkan orang tentu banyak pula yang tinggal
di sana – maklumlah tatkala ditinggalkannya di situ hanyalah lembah yang
tandus jua – tidak ada seorang makhluk pun di sana.

Kebetulan pada masa Nabi Ibrahim sampai anaknya Ismail
tidak ada di rumah – sedang pergi mencari nafkah. Kedatangannya
itu disambut oleh menantunya (isteri Ismail) dengan
cara yang tidak memuaskan bahkan ia tidak pun ditahan
menunggu suaminya tiba. Melihat sambutan yang tidak memuaskan
itu maka Nabi Ibrahim pun balik semula ke Palestin dengan
menantunya tidak mengetahui yang datang itu ialah mertuanya.

Berita kedatangan Nabi Ibrahim itu telah sampai kepada
pengetahuan anaknya Ismail iaitu sepulangan daripada tempat
perusahaannya. Perbuatan isterinya itu tidak menyenangkan
hatinya oleh sebab isterinya itu tidak mengenang budi dan
kehormatan dan dengan yang demikian isterinya itu pun dicerainya.
Tidak lama antaranya maka nabi Ismail pun ia kahwin
dengan seorang puteri daripada bangsa Jurhum pula, akhlaknya
adalah lebih baik daripada isterinya yang mula itu. Isteri
yang kedua ini, apabila nabi Ibrahim tiba telah menyambut orang

tua itu dengan sambutan yang memuaskan dengan menjamu
dengan makanan yang seada-adanya.

Daripada isteri yang akhir inilah nabi Ismail mendapat
12 orang anak dan daripada 12 anak inilah yang menjadikan
keturunan bangsa Arab yang dinamakan Arab Mustakrabah.
Siti Hajar meninggal dunia lebih dahulu daripada Siti Sarah
dan ditanam di Hajar. Ia wafat dengan meninggalkan bekas yang
tidak dapat dilupakan orang. Taatnya kepada suaminya,
yakinnya kepada Allah, tahu harga diri, suka beralih atas
maslahah umum, berani dan tetap iman adalah menambah
harum namanya dan menjadi sebutan orang kepadanya.
Kehormatannya itu bertambah-tambah lagi oleh kerana daripada
keturunannya itulah diterbitkan oleh Allah utusannya yang
penghabisan iaitu Nabi Muhammad (SAW) selain daripada itu
adalah tempatnya yang asal itu menjadi tempat perhimpunan
dan pertemuan umat Islam sedunia.

Apakah perbezaan di antara kedua mereka itu (Sarah dan
Hajar), apakah pengorbanan mereka itu? Inilah yang patut kita
perhatikan – insyaAllah akan ditulis di belakang nanti.